

INUIT ATAQATIGIIT

Inatsisartuni



UPA 2017/50
11.05.2017
Peter Olsen

Naalakkersuisut oqaatsinut kiffartuussivimmik pilersitseqqullugit aalajangiiffigisassatut siunnersuut. Oqaatsnik kiffartuussivik oqaatsinut siunnersortinik inuttaqassaaq, kalaallisut oqaatsitta atorneqarnerini nakkutilliviussalluni aammalu siunnersuinermik neqerooruteqassalluni, tusagassiutinilu oqaatsitta atorneqarnissaannik ilinniartitsiffiusinnaassalluni.

(Inatsisartunut ilaasortaq, Mimi Karlsen, Inuit Ataqatigiit)

Inatsisartunut ilaasortap Mimi Karlsenip Inuit Ataqatigiinneersup aaliangiiffigisassatut siunnersuutanut qulaani pineqartumut qujalluta, matumuuna Inuit Ataqatigiinniit imatut oqaaseqassagut.

Nunarsuarmi innuttaasut 7 milliardit missaasa akornannit, ullumikkut nunarsuarput tamakkerlugu oqaatsit atorneqartut assigiinngitsut 6 – 7000-it missaaniinnerartarpaat.

Oqaatsit pillugit ilisimatuut siulittuipput nunarsuarmioqataalerataluttuinnarnerup (globaliseringip) aqqani, ukiut 100-it missaat qaanngiuppata nunarsuarmi oqaatsinit 7000-it missaanniittuningaaniit affaasa missaat atorneqarunnaareersimassasut. Imaappoq tammareersimassasut.

Assersuutigiinnarsinnaavarput eqqillit imminnut sioux-nik taasimasut ilaat kingulleq Red Thunder Cloud (kallerup nuiaa aappaluttoq?) 1996-mi toquneratigut unnia sioux-it oqaasi aamma nunguinarsimapput oqaluttuaannanngorlutillu. Oqaatsit kulturilu ukiuni kingullerni 200-300-ni Canadap avannaarsuaniit kujammut Mississippip orpippassuaqarfia naggorissoq tikillugu atorluarneqarsimaga-luartut pingaaruteqarluarsimagaluartullu Red Thunder Cloudip toquneratigut annaaneqarput oqalut-tuannanngorlutillu.

Taakkunaanngillalli: aamma nalunngilarput naggueqatitta akornanni oqaatsit tungaatigut ajornator-siortoqartoq allaat tusaamallutigu inuuusutorpassuit akornanni namminneq oqaatsiminnik atuisinna-angitsut amerligaluttuinnartut, allaat utoqqartaminnik oqaloqateqarsinnaanngitsulluunniit amerliga-luttuinnartut. Allaat ernumasutigineqarluni utoqqartaasut qimaguppata naggueqatitta akornanni oqaatsit kulturilu aamma annaaneqarlutik oqaluttuaannanngorsinnaanerat. Soorlu aamma eqqillit Sioux-it tamanna aqusaareersimagaat.

Immitsinnut qiviarutta 1960-kkunni 70'-kkunniliu aamma nalunngilarput qanoq pisoqarsimanersoq; qallunaanngorsagaasimavugut oqaatsivullu nungusagaasimapput. Qujanartumilli siulitta ukiorpassuarni ilungersoreerneratigut 1979-mi namminersornerulerneq eqqunneqarpoq, tamatumalu kinguneraa oqaatsitta kulturittalu illersorneqarnissaata, tammatsaaliorneqarnissaatalu tunngaviliiffigineqarnerat.

Ukiut 38-it qaanngiutillartullu sumut killippugut? Qanoq ingerlavugut? Sumiippugut aamma sumut killippugut? Oqaatsitta ullumikkut nunatsinni atorneqarnerat qanoq ingerlava? Ingerlalluarpa? Ingerlanerluppa? Illersorneqarsinnaasumik ingerlanneqarpa?

Naatsumik oqaatigissagaanni oqaatsivut kulturerpullu Nuup avataani ajunngitsumik imminullu illersorsinnaasumik ingerlanneqartutut oqaatigineqarsinnaavoq, taamattorli Nuup illoqarfia eqqarsa- atigissagaanni soorluuna tassani oqaatsit tungaasigut tusiapittoqarneranik oqartoqarsinnaasoq. Nuup illoqarfianiinnaangitsoq aammali tusagassiorfinni, inuuusuttorpassuillu akornanni oqaatsitsinnik atuineq soorluuna naammaginarpallaarunaariartortoq?

Tusagassiutit maligassiuisuupput inuiaqatigiinni pingaarutilimmik inisisimaffeqarnertik pissuti- galugu. Taamaattumik tusagassiutit oqaatsit tungaasigut nukittuumik inisisimanissaat pingaarute- qarluinnarpoq. Sanilitsinniittut Islandermiut assersuutigiinnarsinaavagut: Radiukkut TV-kkullu aalla-kaatitsisarfissuarminni RÚV-mi (uagut soorlu KNR-itsitut ittumi) oqaatsinut politikkimik pilersit-simapput, tassunga ilutigalugu oqaatsinut tunngasunik ilinniarluarsimasunik pingasunik atorfilitta-qalersimallutik.

Inuit pineqartut tusagassiortunut siunnertortaapput, pikkorissaallutik siunnersuisartuupput, kukku- neriuuisartuullutik, oqaatsit pillugit oqallitsisarisput, ilaanni ilumoorsaartunik ilaannilu ilumoorsaan- ngikkaluartunik aliikkusiarfittut oqaatigineqarsinnaasunik. Siunertaq ataaseq pingaardeq tassaagin- narpoq; Islandermiut oqaasineq eqqortumik atuinissaq, pitsangorsaanissaq nukittorsaanissarlu.

Taamaattumik Inuit Ataqatigiinniit inatsisartunut ilaasortaq Mimi Karlsen isumaqatigaarpuit oqarmat nunatsinni aaqqissuussineq taamaattoq isumassarsiorfigilluarsinnaagippuit atoruarsinnaagippullu.

Nunatsinni oqaasileriffeqareerpugut. Oqaasileriffik suleqatigalugu oqaatsinut kiffartuussivissamik pilersitsisinnaagaluarpuugut. Kiffartuussiviup suliassaasa ilagisinnaavaat; pikkorissaaneq, siunnersui-neq, kukkunersiuneq, oqaatsit pillugit oqallitsitsineq nukittorsaanerlu.

Taamaattumik taamatut oqaaseqarluta Mimi Karlsenip siunnersuutaa Inuit Ataqatigiinnit taperserlugu ataatsimiisitaliamut susassaqartumut ingerlateqqinnejarnissaa akuersissutigaarpuit.

Qujanaq

Peter Olsen